

Abitar

«Marellas» dal Radio Rumantsch sin disc cumpact, part 9

En il mir

En il Grischun datti 33 mirs da serra cun ina lunghezza totala da 8,5 km. In mir n'è però betg be in mir. En ses intern datti salas e corridors ed ils guardians mesiran mintga moviment dal betun e dal spelm. La Marella fa cun Dario Rogantini in viadi tras il mir da serra da l'Albigna en Bregaglia ed ella discorra cun l'inschigner Erwin Degonda davart la construcziun, ils tips da mir, las mesiras da segirezza e scenaris da catastrofa pussaivels. (Emissiun dals 1 da zercladur 2008; redacziun: Guadench Dazzi).

Effizienz d'energia: per la bursa, il clima e la conscienza

Experts din che mintgin da nus pudess spargnar senza nagina perdita da confort enfin in terz da l'energia. Daco pari però d'esser uschè grev da far ils emprims pass, tge portan insumma las singulas mesiras e co vul la politica persvader l'industria ed ils



consuments da daventar pli economics? Co statti en nossas chasadas, nua sfarlatan nus energia e nua pudess ins facilmain optimar l'effizienz? A maun d'exempels pratics mussa la Marella nua e co che ins pudess spargnar energia tar il stgudament e cun l'isolaziun, tar apparats per la chasada e tar la gliisch. (Emissiun dals 15 d'avrigl 2007; redacziun: Guadench Dazzi).

Ina chasa dad oz per damaun – la chasa passiva

Tgi che bajegia oz, bajegia per l'avegnir – hai num en la documentaziun da la «IG Passivhaus Schweiz», ina cuminanza d'interess che vul derasar uschè svelto sco pussaivel la tecnologia per chasas passivas. Questas chasas dovrian anc circa 15 % da l'energia d'ina chasa convenziunala hai num ed ellas porschian in confort maximal. Nua è lura il crutsch, sa dumonda la Marella, che betg tut quels e quellas che bajegian vulan ina chasa passiva. Michael Hartmann è architect ed el ha vull per el e sia famiglia ina tala chasa. A Vaz/Muldaun sta ella – l'emprima chasa passiva dal Grischun che porta il certificat da Minergia-P. (Emissiun dals 2 d'avrigl 2006; redacziun: Maria Cadruvi).

Per tumbins e chanals

Els èn quaders e radunds, gronds e pitschens, cun e senza foras u averturas – sin nossas vias datti millis da tumbins. Christian Ratti è aurer, artist e «tumbinolog», in che sa fatschenta intensivmain cun l'istorgia e las particularitads da quest object quotidian e pauc remartgà. Daco è la gronda part dals tumbins radunds e tge sa zuppa tut sut noss tumbins? La Marella fa ina spassegiada tras las giassas da Cuira e dat in sguard en il sutteran. Per exempel cun in gir tras

in sectur dals passa 270 km chanelisaziun da la citad da Cuira. (Emissiun dals 4 da settember 2011; redacziun: Guadench Dazzi).

Fabrics che schubregian aua – las sereneras

La Marella ha fatg ina visita en trais sereneras grischunas. Ensem cun Gieri Deplazes, il chau da l'Uffizi chantunal per auas ed auas tschuffas, essan nus stads a Trun, Cunter e Cuira. Trun è ina tipica serenera mesauna e vulesch uss bajegiar in indriz per sientar la gliitta cun energia solara. La serenera da Cunter ha cunzunt da dar dumogn a las grondas differenzas tranter stagiun auta e stagiun bassa e la serenera da Cuira è la pli gronda en il Grischun. (Emissiun dals 2 da settember 2001; redacziun: Daniela Cavelti).

Bajegiar chasa – in tema plain istorgias

La Marella raquinta da quest tema en tschintg chapitels. Tranter auter pertge che la gliעד bajegia pliras giadas e vul sa deliberar da tradiziuns; sur dal gust da restaurar ina chasa veglia, ma er sur dals disgusts ch'i po dar cun l'architect e mastergnants. La Marella va als fundaments e preschenta er l'optica dals architects – tge dovri per che la chemia tranter patrun da construcziun e l'architect constettia? (Emissiun dals 8 d'avrigl 2007; redacziun: Casimir Schmid).

En chadafieu – in mund entir

Co èsi sche persunas da differentas culturas lavuran ensem? En la chadafieu da l'Hotel Piz Linard a Lavin lavuran Miguel e Bruno dal Portugal, Kunga dal Tibet, Ruhollah da l'Afganistan ed Osman da l'Eritrea. Trais dad els èn requisants d'asil. Ensem cuschinan, servan e lavan els giu. Discurrer discurren els ensem tudestg, hindi, englais, portugais, talian e cun ils mauns. Els raquintan co e pertge ch'els èn vegnids a Lavin, en chadafieu – en in mund ester. (Emissiun dals 8 d'avrigl 2012; redacziun: Anna Serarda Campell).

Quella na dessan nus mai davent!

Quai din blers ch'han en stiva ina pignascalegl – ed en persvadids che lur pigna è unica ed ha si'atgna istorgia. Maria Cadruvi è ida a Mompé Medel quasi da chasa tar chasa a «rimnar» istorgias da pignas-scalegl. Vegni ensem è da tuttas sorts: Ina pigna da 132 onns en ina chasa nova, ina pigna d'ozendi che cuntegn tecnologia moderna da stgudar aua ed ina pigna pitschna en ina remisa stgira che spetga ch'ella vegnia forsà puspè duvrada in di. (Emissiun dals 29 d'october 2006; redacziun: Maria Cadruvi).

Il banc-pigna – lieu d'entupada privat

El ha da tuttas sorts lunghezzas e largezzas. Savens collian ins el cun regurdientschas d'uffanza. Il non che ra-



Bajegiar in agen dachasa – in siemi per blers.

FOTO: PD

quinta paraulas ed istorgias en stiva chauda. Ubain la nona che fa cun stgaina e dovra l'agid dals biadis. Il banc-pigna è anc oz – surtut en chasas engiadinais – il lieu patgific nua ch'ins fa in cupid da mezdi, u er nua ch'ins sesa la saira cun in magiel vin. (Emissiun dals 16 da mars 2014; redacziun: Anna Caprez).

Perpendiculs e tortas mussan quai ch'ins senta

«Ir cun las tortas ubain laschar girar il perpendiculs, quai sa mintgin», di il president da l'uniun da radiestesia dal Grischun, Beni Jörg. «Ins sto simplmain savair e pudair sa concentrar fitg bain e far dumondas cleras e precisas.» En la Marella raquinta el (ch'è stà electroinschigner) da las beffas ch'el ha gia udi en connex cun la radiestesia. Persvadi ch'i dat chaussas tranter tschiel e terra ch'ins na vesa betg, ma ch'ins po sentir cun simpels instruments, èn er David Baselgia, Celina Degen ed Erwin Tscharner che raquintan en la Marella da lur experientschas. (Emissiun dals 12 d'october 2008; redacziun: Maria Cadruvi).

Ina vita armonica cun feng shui?

Dapli success en la clamada, dapli fortuna en nossa vita, dapli influenza sin il destin e sin la sanadad – quai empermettan ils cussegliaders da feng shui. Il feng shui è ina teoria che deriva da la China e vul dir «vent ed aua». La teoria descriva las leschas elementaras da la vita. In dals instruments ils pli impurtants è in cumpass spezial. Cun quel va il cussegliader per exempel tras in biro e guarda nua che las energias èn positivs e nua negativs. Sche la maisa vegn tschentada en in lieu cun blera energia positiva lavuran ins meglier, vegni pretendi. La Marella ha vull savair dapli. (Emissiun dals 17 da zercladur 2001; redacziun: Daniela Cavelti).

Aua da Grander – hocuspocus u explitgabel?

L'aua da Grander n'è betg aua minerala, mabain aua «vivifitgada». Gia quest pled polarisescha. I dat scienziads che din: quai na datti gnanc! L'aua na sa lascha betg vivifitgar. Ma da l'autra vart datti blera gliעד ch'ha laschà installar aua da Grander en chasa ed è fitg cuntenta. Tut saja meglier: il gust da l'aua e la pasta dal paun. E las fluras, las lingias dal stgudament ed il giat hajan er pli gulent quest'aua. La Marella lascha raquintar differentas persunas da lur bunas experientschas. Ma er in professor da Vienna vegn a pled. In grond scepticher che di: quai è tut mo imaginaziun.

(Emissiun dals 27 da schaner 2008; redacziun: Maria Cadruvi).

Sur cunfins – en schreibertins

Schreibertins, quai èn oz lieux multicultural, ina «Suisse Miniature» pudess ins prest dir. Tuttina – er en il paradisi datti reglas, cunfins ed er conflicts. In che sa da tge ch'el discorra è Mano Khalil, il reschissur dal film «Unser Garten Eden». Il film documentar descriva ils ortulans e lur schreibertins da Bottigenmoos a Berna. Nus avain visetl el en ses iert, ma er ortulans da Domat raquintan da lur experientschas sin in nivel internaziunal da co-ortulaziun. (Emissiun dals 8 d'avust 2010; redacziun: Andrin Willi).

Meis prümbaran, la mi'acila, miu cuolm – è in paradisi

Jau sun forsà in dals davos che fa anc quai...

...di Placi Giusep Pelican da Surrein. E manegia in dals davos che chascha si «mises» la primavaira. Quest onn è il giuven da 31 onns i siador cun 10 vatgas e 13 chauras. Per star sin in'acila sur Surrein avant ch'il muvel giaja ad alp. Durant circa duas emnas ha el fatg ad acila in di chaschiel vatga e l'auter di chaschiel chaura. «La Marella» ha dastgà guardar – e documentescha uschia co ch'in dals davos Rumantschs «fa matg» ad acila sco quai ch'igl è stà usit onns e decennis. La visita tar Placi Giusep Pelican è l'emprima da sis reportaschas da la vita ad acila. (Emissiun dals 26 da zercladur 2005; redacziun: Maria Cadruvi).

Sur Cunter siador è lura «surasonitga»

...di Rätia Uffer che lavura a Savognin, abitescha a Cunter e va davent da la primavaira enfin l'atun mintga saira ad acila a durmir. Sin ses Promastgel. «Sch'igl è insatgi ch'ha in paradisi sin terra, sche quai essan nus si Promastgel», di ella. Là si èsi per ella bellezza: la vista, la cuminanza tranter vischins e la quietezza. Sia chamona è il lieu da sia vita il pli impurtant, raquinta la dunna da 59 onns. (Emissiun dals 3 da fanadur 2005; redacziun: Maria Cadruvi).

Jau vegn si vairamain memia pauc...

...di Reto Mengiardi da ses «prümbaran» si Munt sur Ardez. Qua ha el bleras regardanzas da si'uffanza, per exempel da lur chamona ch'era ida en muschna l'onn 1951 e che ses bab ha reconstrui. E qua, gist sper questa chamona da famiglia, ha l'anterior cusseglier guvernativ cumprà in'atgna chamona ch'el ha renovà. El è sia dunna Vreni han mess en lur prümbaran bleras chaussas persunalas ch'han per els ina valor emozionala:

tranter auter fotografias veglias e vascHELLA propi fatga per ad acila. (Emissiun dals 10 da fanadur 2005; redacziun: Maria Cadruvi).

Bavugls è per mai il parvis...

...di Margrit Schneider-Mani. Da questa vischnanchetta dad aclas aut siador sur Pignia en Schons ha ella milli regardanzas. Cur ch'ella era anc uffant gievan els siador per quatter emnas la stad, a far fain si Bavugls. Els predevan las giaglinas cun els e 10 kilos paun. Oz è tut in pau auter si Bavugls. Las tegias d'acila èn vegnidas bajegiadas ora e la gliעד vegn e va e vegn e va. Ella è cuntenta sch'ella po star in temp là si. Bavugls è per ella in lieu da forza. (Emissiun dals 17 da fanadur 2005; redacziun: Maria Cadruvi).

Qua hai jau investì suaditsch ed energia

...di Gieri Tschuor cur ch'el discorra da si'acila sur Rueun. El ha cumprà avant 12 onns in'acila cun ina tegia veglia ed ha renovà quella plaunsieu, cun far sez uschè bler sco pussaivel. Gieri Tschuor ch'è scolast secundar gjauda da far differentas lavurs ad acila, tranter auter er da far or laina. Ma el sa er vegnir si d'acila a smarschunar. El observa tge che crescha e viva enturn tegia ed el ponderescha bain tge ch'el installescha en tegia. E natel n'ha el quasi mai cun el. (Emissiun dals 24 da fanadur 2005; redacziun: Maria Cadruvi).

Acila ed ospitalità – quai va ensem...

...di Agi Fetz si Blaunca en l'Engiadin'Ota, sin 2037 m sur mar. La schurnalista oriunda da Domat enconuscha er fitg bain las aclas da Domat. Er là è ed era l'ospitalità in impurtant punct da la vita ad acila. A Blaunca sur il Lai da Segl avevan ils purs bergiagliots pli baud lur prümbaran. Oz è Blaunca in refugi dal temp liber. Ed Agi Fetz passenta si qua uschè bler temp sco pussaivel – betg en ina pitschna tegia d'acila, mabain en ina chasa cun tut il confort, ina chasa en in grond clavà vegl. (Emissiun dals 7 d'avust 2005; redacziun: Maria Cadruvi).

La presentaziun:

«Marellas» dal Radio Rumantsch: Contribuziuns emessas ils onns 2001–2015, accessiblas en la Biblioteca chantunala sin disc cumpact.

Dapli infurmaziuns:

chatta.ch/?hiid=4734
www.chatta.ch



Las aclas dal Grischun – in mund da vacanzas per sasez.

FOTO: PD